

王臨川全集

~ 16  
891  
9





16  
891  
9



王臨川全集卷四十一

劄子

擬上殿劄子

臣蒙恩奉使歸報陛下敢因邊事之所及冒言天下之事  
伏惟陛下詳思而擇其中天下幸甚臣竊見陛下有恭儉  
之德有聰明睿智之才有仁民愛物之意顧內不能無以  
社稷爲憂外則不能無患於夷狄天下之才力日以窮困  
而風俗日以衰壞四方有智之士惴惴然常恐天下之不  
久安此其故何也患在無法度故也今朝廷法嚴令具無  
所不有而臣以謂無法度者方今之法度多不合於先王  
之法度故也孟子曰有仁心仁聞而人不被其澤者爲政



三原 卷四 一  
不法先王之道故也非此之謂乎以今之時方先王之時  
遠矣所遭之時所遇之變不同而欲一一修先王之政雖  
甚愚者猶知其難也而臣以謂當今之失患在不法先王  
之政者以謂當法其意而已夫五帝三王相去蓋千有餘  
歲一治一亂盛衰之時具矣其所遭之變所遇之勢不同  
其施設之方亦皆殊而其爲國家之意本末先後未嘗不  
同也臣故曰當法其意而已法其意則吾所改易更革不  
至乎傾駭天下之耳目囂天下之口而固已合乎先王之  
政矣雖然以方今之勢揆之陛下雖欲改易更革天下之  
事合於先王之意其勢未必能也陛下有恭儉之德有聰  
明之才有仁民愛物之意則何爲而不成何欲而不

得而臣固以謂雖欲改易更革天下之事合於先王之意  
其勢未必能者何也方今天下之吏才少故也朝廷之人  
才固嘗簡在陛下之聰明以臣使事之所及則一路數千  
里之間能推行朝廷之法知其所緩急而一切能修其職  
事者甚少而不才苟簡貪鄙之人至不可勝數其能講先  
王之意以合當世之變者蓋闔郡之間往往而絕也夫人  
才不足則陛下雖欲改易更革天下之事以合先王之意  
大臣雖有能當陛下之意而領此者九州之大四海之遠  
萬官之眾孰能一一推行之使人人蒙其施者乎臣故曰  
其勢未必能也然則方今之急在乎人才而已今之天下  
亦先王之天下先王之時人才嘗眾矣蓋其所以陶冶而



成之者有道所謂陶冶以成之者詩書傳記之所載其大略可見矣陛下嘗試詳延大臣左右及天下智能才諳之士使其論先王所以成天下之才者其設施之方如何今之所以異於先王而人才不足者其咎安在其欲變而通因擇其言之近於理者使之相與上下反覆爲論焉因取其宜於時者施焉則人才宜眾矣夫成人之才甚不難人所願得者尊爵厚祿而所榮者善行所恥者惡名也今操利勢以臨天下之士勸之以其所榮而予之以其所願則孰肯背而不爲者特患不能爾而吾所以責之者又中人之所能爲則不能者又少矣夫成人之才甚不難而自古

往往不能成人之才何也以人主之才不足故也蓋人主無恭儉之德無聰明睿智之才無仁民愛物之意則嬖倖諂諛姦罔蔽欺殘賊放恣之人皆得志於時而推其類以亂天下雖有良法不能成天下之才矣今陛下有恭儉之德有聰明睿智之才有仁民愛物之意而又因天下之所願以爲輔相者公聽竝觀以進退天下之士則所以成天下之才特患無良法而陛下推至誠惻怛之心以行之則臣雖愚固知人之才不難成也人才旣眾則陛下何爲而不成何欲而不得夫然後改易更革天下之事以合乎先王之意甚易也陛下不能如此苟於積敝之末流因不足任之才而脩不足爲之法臣恐在軍者日以勞而士民愈



以窮困汙濫而於天下國家愈甚無補也臣幸以使事歸  
報徒舉利害之一二而無補於世非臣之所以事陛下倦  
倦之義也輒不自知其駑下而敢言國家之大體伏惟陛  
下詳擇其中天下幸甚也

上五事劄子

陛下卽位五年更張改造者數千百事而爲書具爲法立  
而爲利者何其多也就其多而求其法最大其效最晚其  
議論最多者五事也一曰和戎二曰青苗三曰免役四曰  
保甲五曰市易今青唐洮河幅員三千餘里舉戎羌之眾  
二十萬獻其地因爲熟戶則和戎之策已効矣昔之貧者  
舉息於豪民今之貧者舉息之於官官薄其息而民救

其乏則青苗之令已行矣惟免役也保甲也市易也此三  
者有大利害焉得其人而行之則爲大利非其人而行之  
則爲大害緩而圖之則爲大利急而成之則爲大害傳曰  
事不師古以克永世匪說攸聞若三法者可謂師古矣然  
而知古之道然後能行古之法此臣所謂大利害者也蓋  
免役之法出於周官所謂府史胥徒王制所謂庶人在官  
者也然而九州之民貧富不均風俗不齊版籍之高下不  
足據今一旦變之則使之家至戶到均平如一舉天下之  
役人人用募釋天下之農歸於畝畝苟不得其人而行則  
五等必不平而募役必不均矣保甲之法起於三代丘甲  
管仲用之齊子產用之鄭商君用之秦仲長統言之漢而



非今日之立異也然而天下之人鳧居鴈聚散而之四方而無禁也者數千百年矣今一旦變之使行什伍相維鄰里相屬察姦而顯諸仁宿兵而藏諸用苟不得其人而行之則搔之以追呼駭之以調發而民心搖矣市易之法起於周之司市漢之平準今以百萬緡之錢權物價之輕重以通商而貫之令民以歲入數萬緡息然甚知天下之貨賄未甚行竊恐希功幸賞之人速求成效於年歲之間則吾法隳矣臣故曰三法者得其人緩而謀之則爲大利非其人急而成之則爲大害故免役之法成則農時不奪而民力均矣保甲之法成則寇亂息而威勢彊矣市易之法成則貨賄通流而國用饒矣

### 議入廟劄子

臣今日曾公亮傳聖旨以臣寮上言郊祀不當入廟令臣詳議臣愚以爲制天下之事當令本末終始相稱今旣奉先帝遺詔外行以日易月之禮又諸所以崇事祖宗皆循本朝制度獨於入廟則欲變先帝故事而遠從三代之禮臣恐於事之本末終始不爲相稱必欲盡除近世之制度一以三代爲法則今陛下尙在諒陰之中非可以制禮之時且言者以爲喪三年不祭於廟禮也而今乃欲令公卿代告此何禮也臣竊以爲今之禮不合於三代者多矣言者不以爲非而專疑不當入廟者蓋於所習見則安於所罕見則怪恐不足畱聖聽也臣學術淺陋誤蒙訪逮敢不



盡愚取進止

言尊號劄子

庚戌六月七日

臣伏以陛下緝熙光明如日之方升布利施澤如川之方至號名於實豈能有所增加輒復卷卷妄有陳請徒以祖宗故事適在此時臣子之心懷不能已陛下受而不拒足以俯順人心臣獨不能無疑者陛下以西垂之勞方以過爲在已遽膺徽冊似或未安臣等以歸美爲忠陛下以撝謙爲德布之海內誰曰不然伏惟聖心更賜詳酌

論罷春燕劄子

臣竊以邊夷外畔士卒內潰吏民騷動死傷接踵恐非燕而用樂之時且此月休假已多又加兩日卽恐急奏或致留滯臣愚謂宜罷燕以副聖心仁惻且又不妨應接機速公事如蒙省察乞賜中旨施行

論館職劄子二

臣伏見今館職一除乃至十人此本所以儲公卿之材也然陛下試求以爲講官則必不知其誰可試求以爲諫官則必不知其誰可試求以爲監司則必不知其誰可此患在於不親考試以實故也孟子曰國人皆曰賢然後察之見賢焉然後用之今所除館職特一二大臣以爲賢而已非國人皆曰賢國人皆曰賢尙未可信用必躬察見其可賢而後用况於一二大臣以爲賢而已何可遽信而用也臣願陛下察舉眾人所謂材良而行美可以爲公卿者召



三國川集卷四十一  
令三館祇候雖已帶館職亦可令兼祇候事有當議論者  
召至中書或召至禁中令具條奏是非利害及所當施設  
之方及察其才可以備任使者有四方之事則令往相視  
問察而又或令參覆其所言是非利害其所言是非利害  
雖不盡中義理可施用然其於相視問察能詳盡而不爲  
蔽欺者卽皆可以備任使之才也其有經術者又令講說  
如此至於數四則材否略見然後罷其否者而召其材者  
更親訪問以事訪問以事非一事而後可以知其人之實  
也必至於期年所訪一二十事則其人之賢不肖審矣然  
後隨其材之所宜任使其尤材良行美可與謀者雖嘗令  
備訪問可也此與用一二大臣薦舉不考試以實而加以

職固萬萬不侔然此說在他時或難行今陛下有堯舜之  
明洞見天下之理臣度無實之人不能蔽也則推行此事  
甚易旣因考試可以出材實又因訪問可以知事情所謂  
敷納以言明試以功用人惟已闢四門明四目達四聰者  
蓋如此而已以今在位乏人上下壅隔之時恐行此不宜  
在眾事之後也然巧言令色孔壬之人能伺人主意所在  
而爲傾邪者此堯舜之所畏而孔子之所欲遠也如此人  
當知而遠之使不得親近然如此人亦有數陛下博訪於  
忠臣良士知其人如此則遠而弗見誤而見之以陛下之  
仁聖以道揆之以人參之亦必知其如此知其如此則宜  
有所懲如此則巧言令色孔壬之徒消而正論不蔽於上



今欲廣聞見而使巧言令色孔壬之徒得志乃所以自蔽  
畏巧言令色孔壬之徒爲害而一切疏遠羣臣亦所以自  
蔽蓋人主之患在不窮理不窮理則不足以知言不知言  
則不足以知人不知人則不能官人不能官人則治道何  
從而興乎陛下堯舜之主也其所明見秦漢以來欲治之  
主未有能髣髴者固非羣臣所能窺望然自堯舜文武皆  
好問以窮理擇人而官之以自助其意以爲王者之職在  
於論道而不在於任事在於擇人而官之而不在於自用  
願陛下以堯舜文武爲法則聖人之功必見於天下至於  
有司叢脞之務恐不足以棄日力勞聖慮也以方今所急  
爲在如此敢不盡愚臣愚才薄然蒙拔擢使豫聞天下之

事聖旨宣諭富弼等欲於講筵召對輔臣討論時事願如  
臣者材薄不足以望陛下之清光然陛下及此言也實天  
下幸甚自備位政府每得進見所論皆有司叢脞之事至  
於大體粗有所及則迫於日晷已復旅退而方今之事非  
博論詳說令所改更施設本末先後小大詳略之方已熟  
於聖心然後以次奉行則治道終無由興起然則如臣者  
非蒙陛下賜之從容則所懷何能自竭蓋自古大有爲之  
君未有不始於憂勤而終於逸樂今陛下仁聖之質秦漢  
以來人主未有企及者也於天下事又非不憂勤然所操  
或非其要所施或未得其方則恐未能終於逸樂無爲而  
治也則於博論詳說豈宜緩然陛下欲賜之從容使兩府



竝進則論議者眾而不一有所懷者或不得自竭謂宜使  
中書密院迭進則人各得盡其所懷而陛下聽覽亦不至  
於煩陛下卽以臣言爲可乞明喻大臣使各舉所知無限  
人數皆實封以聞然後陛下推擇召置以爲三館祇候其  
不足取者旋卽罷去則所置雖多亦無所害也

二

臣伏見某人云云皆眾人所謂材良行美宜蒙陛下訪問  
任使者凡此九人臣或熟聞而未識或熟識而未敢任或  
敢任其可以爲公卿臣雖未識然眾人之所謂賢臣不敢  
蔽也臣雖敢任其可以爲公卿然陛下不親見其可賢亦  
難遽信而用若陛下以臣前所論奏爲合於義理卽乞悉

置此九人者以爲三館祇候親考試其材行若不可用旋  
卽罷去若其可用然後畱備訪問任使如此則所置雖多  
未有濫得官職者然此但臣一人所聞所知恐執政大臣  
各有所聞所知陛下若令各舉所聞所知而如此考試庶  
幾人材無所遺逸經曰舉逸民天下之民歸心焉善人君  
子者天下之民心所願舉欲其延問視其所在而從之者  
也陛下自卽位已來以在事之人或乏材能故所拔用者  
多士之有小材而無行義者此等人得志則風俗壞風俗  
壞則朝夕左右者皆懷利以事陛下而不足以質朝廷之  
是非使於四方者皆懷利以事陛下而不可以知天下之  
利害其弊已効見於前矣恐不宜不察也欲救此弊亦在



親近忠良而已伏惟陛下仁聖已深察此理臣愚猶敢及此者忠臣惓惓之義也

本朝百年無事劄子

臣前蒙陛下問及本朝所以享國百年天下無事之故臣以淺陋誤承聖問迫於日晷不敢久畱語不及悉遂辭而退竊惟念聖問及此天下之福而臣遂無一言之獻非近臣所以事君之義故敢昧冒而粗有所陳伏惟太祖躬上智獨見之明而周知人物之情僞指揮付託必盡其材變置施設必當其務故能駕馭將帥訓齊士卒外以扞夷狄內以平中國於是除苛賦止虐刑廢強橫之藩鎮誅貪殘之官吏躬以簡儉爲天下先其於出政發令之間一以安

利元元爲事太宗承之以聰武真宗守之以謙仁以至仁宗英宗無有逸德此所以享國百年而天下無事也仁宗在位歷年最久臣於時實備從官施爲本末臣所親見嘗試爲陛下陳其一二而陛下詳擇其可亦足以申鑒於方今伏惟仁宗之爲君也仰畏天俯畏人寬仁恭儉出於自然而忠恕誠懇終始如一未嘗妄興一役未嘗妄殺一人斷獄務在生之而特惡吏之殘擾寧屈已棄財於夷狄而終不忍加兵刑平而公賞重而信納用諫官御史公聽竝觀而不蔽於偏至之讒因任眾人耳目拔舉疎遠而隨之以相坐之法蓋監司之吏以至州縣無敢暴虐殘酷擅有調發以傷百姓自夏人順服蠻夷遂無大變邊人父子夫



婦得免於兵死而中國之人安逸蕃息以至今日者未嘗  
妄興一役未嘗妄殺一人斷獄務在生之而特惡吏之殘  
擾寧屈已棄財於夷狄而不忍加兵之効也大臣貴戚左  
右近習莫敢強橫犯法其自重慎或甚於閭巷之人此刑  
平而公之効也募天下驍雄橫猾以爲兵幾至百萬非有  
良將以御之而謀變者輒敗聚天下財物雖有文籍委之  
府史非有能吏以鈎考而斷盜者輒發凶年饑歲流者填  
道死者相枕而寇攘者輒得此賞重而信之効也大臣貴  
戚左右近習莫能大擅威福廣私貨賂一有姦慝隨輒上  
聞貪邪橫猾雖間或見用未嘗得久此納用諫官御史公  
聽竝觀而不蔽於偏至之讒之効也白縣令京官以至監

司臺閣陞擢之任雖不皆得人然一時之所謂才士亦罕  
蔽塞而不見收舉者此因任眾人之耳目拔舉疎遠而隨  
之以相坐之法之効也升遐之日天下號慟如喪考妣此  
寬仁恭儉出於自然忠恕誠懇終始如一之効也然本朝  
累世因循末俗之弊而無親友羣臣之議人君朝夕與處  
不過宦官女子出而視事又不過有司之細故未嘗如古  
大有爲之君與學士大夫討論先王之法以措之天下也  
一切因任自然之理勢而精神之運有所不加名實之間  
有所不察君子非不見貴然小人亦得廁其間正論非不  
見容然邪說亦有時而用以詩賦記誦求天下之士而無  
學校養成之法以科名資歷敘朝廷之位而無官司課試



之方監司無檢察之人守將非選擇之吏轉徙之亟既難於考績而游談之眾因得以亂真交私養望者多得顯官獨立營職者或見排沮故上下偷惰取容而已雖有能者在職亦無以異於庸人農民壞於繇役而未嘗特見救恤又不爲之設官以修其水土之利兵士雜於疲老而未嘗申勅訓練又不爲之擇將而久其疆場之權宿衛則聚卒伍無賴之人而未有以變五代姑息羈縻之俗宗室則無教訓選舉之實而未有以合先王親疎隆殺之宜其於理財大抵無法故雖儉約而民不富雖憂勤而國不强賴非夷狄昌熾之時又無堯湯水旱之變故天下無事過於百年雖曰人事亦天助也蓋累聖相繼仰畏天俯畏人寬仁

恭儉忠恕誠懇此其所以獲天助也伏惟陛下躬上聖之質承無窮之緒知天助之不可常恃知人事之不可怠終則大有爲之時正在今日臣不敢輒廢將明之義而苟逃諱忌之誅伏惟陛下幸赦而畱神則天下之福也取進止



王臨川全集卷四十一終

王臨川全集卷四十二

劄子

相度牧馬所舉薛向劄子

臣等竊觀自古國馬盛衰皆以所任得人失人而已汧渭之間未嘗無牧而非子獨能蕃息於周河隴之間未嘗無牧而張萬歲獨能蕃息於唐此前世得人之明效也使得人而不久其官久其官而不使得專其事使得專其事而不臨之以賞罰亦不可以成功今臣等相度陝西一路買馬監牧利害大綱已具奏聞伏見權陝西轉運副使薛向精力強果達於政事河北便糴陝西權鹽皆有已試之效今來相度陝西馬事尤爲詳悉臣等前奏已乞就委薛向



三朝集要卷四十二  
提舉陝西買馬及監牧公事今欲乞降指揮許令久任緣  
今來馬價多出於解池鹽利三司所支銀緡絹等又許令  
於陝西轉運司兌換見錢今薛向既掌解鹽又領陝西財  
賦則通融變轉於事爲便兼臣等訪問得薛向陝西係官  
空地可以興置監牧處甚多若將來稍成次第卽可以漸  
興置蓋得西戎之馬牧之於西方不失其土性一利也因  
未嘗耕墾之地無傷於民二利也因向之材而就令經始  
三利也又河北有河防塘泊之患而土多烏鹵不毛戎馬  
所屯地利不足諸監牧多在此路所占草地多是肥饒而  
馬又不堪未嘗大段孳息若陝西興置監牧漸成次第卽  
河北諸監有可存者悉以陝西良馬易其惡種有可廢者  
悉以肥饒之地賦民於地不足而馬所不宜之處以肥饒  
之地賦民而收其課租以助戎馬之費於地有餘而馬所  
宜之處以未嘗耕墾之地牧馬而無傷於民此又利之大  
者也如允臣等所奏卽乞薛向所奏舉官員及論改舊弊  
朝廷一切應副成功則無愛賞敗事則無憚罰如此則臣  
等保任薛向必能上副朝廷改法之意如將來敗事臣等  
各甘同辜取進止

論許舉畱守令勅劄子

臣伏奉今月二十九日中書降到勅語諸州知州知軍知  
縣縣令內有清白不擾而政迹尤異實惠及民有如係三  
周年或三十箇月替到任已及成資係二周年替到任已



及一年已上其知州軍許本路安撫轉運使副周官提點刑獄知縣縣令卽更與本處知州軍通判竝連署同舉保舉再任仍須於奏狀內將本官到任以來政迹可紀實狀一一條列奏委中書門下更加察訪如不是妄舉卽進呈取旨當議量所述政迹及合入資序推恩許令再任令臣撰勅辭者臣竊以謂朝廷欲使守令之宜民者久於其官誠亦方今政務之先急然勅意有於方今事變尙未合者今審官除知州軍皆待一年八月闕知縣縣令亦大抵待闕一年以上今若使係三年及三十月替者須候成資方得舉畱再任比及朝廷報許卽其人係三十月替者已及替期係三年替者亦已去替期不遠待闕之人亦已赴任

雖未赴任亦多已待闕一年方復使之還就審官別求差遣卽於人情有所未安兼朝廷欲使守令久於其官爲其自知勢可以久則果於有爲而又上下相安莫有苟且之意則必候成資然後許之再任孰若一年以上卽皆許之舉畱如此則已除待闕之人免往返之勞弊而被畱之守令又早自知其當久而於興利除害敢有所爲所有勅詞臣雖已具草如以臣議爲允只乞於所降勅語內除去如係三周年或三十箇月替到任已及成資係二周年替二十二字取進止

乞朝陵劄子

臣當仁宗皇帝英宗皇帝遷坐之時方以遭喪疾病在外



今蒙召還復備從官伏見朝廷將命官朝拜諸陵臣欲備使冀得少紓螻蟻區區感慕之情伏望聖慈特賜矜許取進止

乞免修實錄劄子

臣准閣門報勅差臣與吳充同修英宗皇帝實錄竊緣臣於吳充爲正親家慮有共事之嫌今來實錄院止闕呂公著一人臣於討論綴緝不如吳充精密若止差吳充一人以代公著自足辦事伏望聖恩詳酌指揮所有勅牒臣未敢受取進止

乞改科條制劄子

伏以古之取士皆本於學校故道德一於上而習俗成於下其人材皆足以有爲於世自先王之澤竭教養之法無所本土雖有美材而無學校師友以成就之議者之所患也今欲追復古制以革其弊則患於無漸宜先除去聲病對偶之文使學者得以專意經義以俟朝廷興建學校然後講求三代所以教育選舉之法施於天下庶幾可復古矣所對明經科欲行廢罷并諸科元額內解明經人數添解進士及更俟一次科場不許新應諸科人投下文字漸令改習進士仍於京東陝西河東河北京西五路先置學官使之教導於南省所添進士奏名仍具別作一項止取上件京東等五路應舉人并府監諸路曾應諸科改應進士人數所貴合格者多可以誘進諸科嚮習進士科業如



允所奏乞降勅命施行

廟議劄子

准中書門下奏准治平四年閏三月八日勅遷僖祖廟主藏之夾室臣等聞萬物本乎天人本乎祖故先王廟祀之制有疏而無絕有遠而無遺商周之王斷自稷契以下者非絕譽以上遺之以其自有本統承之故也若夫尊卑之位先後之序則子孫雖齊聖有功不得以加其祖考天下萬世之通道也竊以本朝自僖祖以上世次不可得而知則僖祖有廟與稷契疑無以異今毀其廟而藏其主夾室替祖考之尊而下附於子孫殆非所以順祖宗孝心事亡如事存之義求之前載雖或有然考合於經乃無成憲因情制禮實在聖時伏惟皇帝陛下仁孝聰明紹天稽古動容周旋惟道之從宗祀重事所宜博考乞以臣等所奏付之兩制詳議而擇取其當

議服劄子

先王議服也順性命之理而爲之節恩之深淺義之遠近禮之所與奪刑之所生殺皆於此乎權之傳曰三年之喪未有知其所從來者也蓋暮年及總麻緣是以爲衰而其輕重遲速之制非得與時變易唯貴之於賤或降或絕或否蓋在先王之時諸侯大夫各君其父兄欲尊尊之義有所伸則宜親親之恩有所屈此其所以降絕之意也自封建之法廢諸侯大夫降絕之禮無所復施士大夫無宗其



適孫傳重之屬不可純用周制臣愚以謂方今惟諸侯大夫降絕之禮可廢而適子死非傳爵者無眾子乃可於適孫承重自餘喪服當用周制而已何則先王制服三年之喪以爲差非得與時變易故也然自秦漢以來言禮者或失經旨而歷代承用傳守至今與夫近世改制亦皆有說非以義折衷則不明故臣於所欲定則爲議以辯之末學寡陋獨用已見決干歲以來之所惑恐不能盡伏乞以付學士大夫博議令臣復與反復

議南郊三聖並侑劄子

臣等聞推尊尊以享帝義之至推親親以享親仁之極尊尊不可以瀆故郊無二主親親不可以僭故廟止其先今三后並配欲以致孝也而適所以瀆乎享帝後宮有廟欲以廣恩也而適所以僭乎享親推存事亡則非所以寧親也臣等今詳議欲乞各如禮官所議

議郊祀壇制劄子

先王所以郊於神明壇坎牲幣器服時日形色度數莫不依其象類易曰一陰一陽之謂道乾陽物也坤陰物也冬至祀天於地上之圓丘所謂爲高必因丘陵而因天事天也夏日至祭地於澤中之方丘所謂爲下必因川澤而因地事地也蓋陽以圓爲形其性動陰以方爲體其性靜天陽而動故祀於地上之圓丘而禮神以蒼璧亦圓也地陰而靜故祭於澤中之方丘而禮神以黃琮亦方也



合祀天地爲圓壇而於國陽之地上豈聖人以類求神之  
意哉熙寧郊儀祭皇地示壇八角祭神州地示壇廣四十  
八步高五尺今則變方爲圓壇神州築方壇而復無坎皆  
不應禮伏請皇地示神州地示爲方壇壇之外爲坎庶協  
古制

議郊廟太牢劄子

謹按禮記王制祭宗廟之牛角握周禮小司徒凡小祭祀  
奉牛牲入古者諸侯五廟初祠烝嘗每廟一太牢大夫三  
廟有天子之大夫故曰大夫用索牛謂之索者求得而用  
之但不在條而已諸侯之祔祭用太牢吉祭則少牢自諸  
侯與天子之大夫時祭用牲如此然則天子之祭用牛者

可知矣唐郊祀并宗廟社稷等祭悉用太牢其後稍易舊  
制九廟時享有攝事共用一犢國朝開寶初冬至親郊詔  
有司宗廟共用犢一郊壇用犢三又詔其常祀惟昊天  
帝用犢自餘大祀悉以羊豕代之嘉祐中仁宗親祫卽每  
室用太牢自餘三年親祀八室共用一犢有司攝事惟以  
羊豕記曰先王之制禮也不可多也不可寡也唯其稱也  
是故君子太牢而祭謂之禮曰君子謂大夫以上也夫以  
天下奉其祖禰而廟享牲牢用過乎儉不可謂稱今三年  
親祠而八室共用一犢及祫享盛祭有司攝事而少牢則  
非稱欲乞三年親祠并時饗有司攝事伏請太廟每室並  
用太牢一貼黃竊恐朝廷以牛數多或乞時饗且仍舊制



右奉聖旨唯親祠并祫享每室用太牢

議皇地示神州地示不合燎燔事劄子

伏爲北郊所祭皇地示并神州地示祇合坎瘞自來卻如祭天升煙之義別建一壇燔祝版臣昨累次具狀奏聞乞行改正雖蒙聖旨下有司詳定又緣所定壇壝儀注條件不少考求典故未能遽革伏覩今月二十一日神州地示亦依襲故常泥飾壇燎依舊行事臣昨亦備述自古以來祭祀皆爲瘞坎蓋取就下求陰之義及考先儒所祭地示卽無標燎之文伏覩國朝祀儀所載祀辭亦曰瘞儀卻行燔燎之禮顯是從來差錯恐瀆于神欲乞不候議定諸壇壝等制度先次考正今來瘞埋之義更不於壇上燔燎祝

版以別天神地示之異上副陛下脩誠致孝肅恭祠享之意奏聞候勅旨狀前批送太常禮院本所謹案古者祀天神燔柴登煙祭皇地示埋瘞蓋燔柴則升煙于上瘞埋則達氣于下求神必以其類故也王涇唐郊祀錄凡祭祀地示則爲瘞埴於神壇之王地方深取足容物祭訖置牲幣祝饌於其中而埋之熙寧祀儀皇地示神州地示皆爲燎壇方一丈高一丈有二尺開上南出方六尺在壇南二十步丙地祭大社大稷又設燎柴於西神門外道北以地示而同之天神之祀殊悖於禮所有今來王某起請實合禮制伏請自今祭皇地示神州地示大社大稷其祝版與牲幣饌物竝瘞於埴更不設燎所有皇地示神州地示燎壇



竝乞除去

進鄴侯遺事劄子

臣前日伏奉聖旨許進鄴侯遺事今繕錄已具然無別本  
參校恐不能無脫誤竊以宇文黑獺之中材遇傾側窮困  
之時而輔之以區區之蘇綽然其爲法尙有可取伏惟陛  
下天縱上智卓然之材全有百年無事萬里之中國欲那  
業垂統追堯舜三代在明道制眾運之而已如李泌所稱  
豈足道哉顧求多聞以考古今得失之數則此書亦或可  
備省覽謹隨劄子上進

王臨川全集卷四十二終

王臨川全集卷四十三

劄子

辭男雱說書劄子

臣今日伏奉聖旨除男雱太子中允崇政殿說書臣雖已  
奏論非宜尙未蒙恩開允事有關於國體豈敢冒昧不言  
臣竊觀陛下卽位已來慎惜名器一介之任必欲因能講  
藝之臣尤爲遴選如雱學問荒淺加以未吏事任試之筭  
庸尙懼不勝論經之地實非所據陛下必欲誤加獎擢實  
恐上累知人任使之明伏乞聖慈察臣懇款追還成命以  
合眾論之公取進止

辭男雱授龍圖劄子三道



臣伏承聖恩以修撰經義罷局除臣男雱龍圖閣直學士  
臣雖已懇辭未蒙昭察伏念臣男雱誤受陛下知獎特以  
粗知承學比奉聖旨撰進經義尙未了畢遂自太子中允  
崇政殿說書擢授右正言充天章閣待制兼侍講當是時  
所叨恩命已駭眾人觀聽在臣父子已所難安伏蒙宣諭  
令臣更勿辭免臣亦以謂聖恩錄進書微効遂不敢辭自  
爾以來雱以疾病隨臣不復與聞經義職事今茲罷局在  
雱更無尺寸可紀之勞不知何名更受褒賞非特於臣父  
子私義所不敢安竊恐朝廷賞罰之公如此極爲有累伏  
望聖慈察臣懇悃追寢誤恩非特臣父子曲蒙保全亦免  
眾人於聖政有所譏議

二

臣伏奉語書以臣乞免臣男雱恩命未賜允俞臣之懇款  
已備前陳螻蟻微誠未能昭徹然國家之賞典務在報功  
施之非宜實累國體非特在臣父子私義所不敢安伏惟  
大明無所不燭察臣非敢妄干聖聽早賜追寢誤恩謹再  
具劄子陳免以聞

三

臣近累具劄子辭免臣男雱恩命伏蒙聖慈特降詔書不  
允者臣之懇誠已具前奏聖恩深厚未卽矜從在臣區區  
實不寧處如臣叨昧尙所難勝况又賤息何名享此賞而  
無勸累國實多伏望聖慈察臣父子皆荷陛下全度之至



恩所以上報生當隕首死當結草而已謹三具劄子陳免  
以聞

進字說劄子

臣在先帝時得許慎說文古字妄嘗覃思究釋其意冀因  
自竭得見崖略若矇視天終以罔然念非所能因畫而止  
頃蒙聖問俯及退復黽勉討論賴恩寬養外假歲月而桑  
榆憊耗久不見功甘師顏至奉被訓勅許錄臣愚妄謂然  
者繕寫投進伏惟大明旁燭無疆豈臣螢爝所敢銜冒承  
命遑迫置慚無所如蒙垂收得御宴閒千百有一儻符神  
旨愚所逮及繼今復上干汙宸展臣無任

乞改三經義誤字劄子二道

元豐三年八月二十八日奉聖旨宜令國子監

依所奏照  
會改正

臣頃奉勅提舉修撰經義而臣聞識不該思索不精校視  
不審無以稱陛下發揮道術啓訓天下後世之意上孤眷  
屬沒有餘責幸蒙大恩休息田里坐竊榮祿免於事累因  
得以疾病之閒考正誤失謹錄如右伏望清燕之閒垂賜  
省觀儻合聖心謂當刊革卽乞付外施行臣干冒天威無  
任云云取進止

尙書義

臯陶謨按見其惡當作按其見亞  
益稷故懋使之化當作則懋使之化  
微子純而不雜故謂之犧犧當作牲完而無傷故謂之牲



牲當作犧

洪範有器也然後有法此書所以謂之範者以五行爲宗故也五行猶未離於形而器出焉者也擴而大謂之弘積而大謂之丕合而大謂之洪此書合五行以成天下之大法故謂之洪範也已上七十一字今欲刪去

又云陶復陶穴尙矣後世易之棟字而其官猶曰司空因其故不忘始也已上二十六字今亦欲刪去

周官唐虞稽古字上漏曰字

周禮義

小宰其財用上其字當作共

大府受藏之府則若職內掌邦之賦入是也受用之府則

若職歲掌邦之賦出是也已上三十字今欲刪去

黨正歲屬其民者四四當作五

誦訓以詔王觀事當去王字

典瑞手足腹背手當作首

家人山林之尸則以山虞已上八字今欲刪去

銜僕掌萬民之復復當作逆

大馭有軌也軌當作軌

大行人三公八命出封加一命則謂之上公已上十四字

今欲刪去

詩義

北風北風以言其威雨雪以言其虐涼者氣也嗜者聲也



雱蓋言聚霏蓋言散氣之所被者近聲之所加者遠聚則一方而已散則無所不如此言其為威虐後甚於前也已上六十三字今欲刪去改云北風之寒也而以為涼北風之厲也而以為嗜此以言其為威雨雪之散也而以為雱雨雪之集也而以為霏此以言其為虐君子偕老玼兮玼兮其之翟也者服之盛也服之盛字下今欲添質宜之三字又云嗟兮嗟兮其之展也蒙彼絢絺是泄裨也者亦服之盛也亦服之盛字上欲減亦字服之盛字下欲添文宜之三字定之方中說於桑田者者當作則干鹿州里之士所建今欲改為鄉黨之官所建

有女同車公子五争争當作爭

駟鐵駟馬既閑駟當作四

墓門食椹而甘椹當作甚

七月去其女桑而猗之然後柔桑可得而求也已上十六

字今欲刪去改云承其女桑而猗之然後遠揚可得而

伐也

又蠶月者非一月故不指言某月也下添云蠶女事也故

稱月焉

又云猗薪之也言猗女桑則遠揚可知矣言伐遠揚則女

桑可知矣皆伐而猗之也已上三十字今欲刪去

車攻言其連絡布散眾多若奕棋然已上十二字今欲刪



去

小旻發言盈廷廷當作庭

桑扈受福不那那當作那

生民麻麥懔懔麥當作麥

公劉篤之字从竹从馬馬行地無疆以竹策之則力行而

有所至篤之為言力行而有所至也已上三十四字今

欲刪去

卷阿藹藹然盛多然當作其又云故次以既醉太平也名

太平二字今合刪去

召旻昏非所以為哲字上漏明字今合添

時邁政之所加孰敢不動懼今欲改云政之所加孰敢不

震動疊息

那磬管將將管當作筦

二

臣近具劄子奏乞改正經義尚有七月詩剝棗者剝其皮而進之養老故也十三字謂亦合刪去如合聖心亦乞付外施行取進止

論改詩義劄子

臣子秀奉聖旨撰進經義臣以當備聖覽故一一經臣手乃敢稱御及設官置局有所改定臣以文辭義理當與人共故不敢專守已見為是既承認頒行學者頗謂所改未妄竊惟陛下欲以經術造成人材而職業其事在臣所見



三  
六  
小有未盡義難自默所有經置局改定諸篇謹依聖旨具錄新舊本進呈內雖舊本今亦小有刪改處并略具所以刪復之意如合聖旨即乞封降檢討呂升卿所解詩義依舊本頒行小有刪改即依聖旨指揮取進止

荅手詔言改經義事劄子

九月十一日

臣伏奉手詔依違之臯臣愚所不敢逃然陛下既推恩惠卿等而除其所解臣愚不敢安此若以其釋說有甚乖誤者責臣更加刪定臣敢不祗承聖訓取進止

改撰詩義序劄子

臣伏奉手詔以臣所進三經義序有過情之言宜速刪去臣雖嘗敷奏以爲文字所宜又奉聖訓再三但令序述解

經之意不須過有稱道伏惟皇帝陛下盛德至善孚於四海非臣筆墨所能加損然因事宣著人臣之職也誠以言之不足爲懼不以近於媚諛爲嫌而上聖所懷深仁謙損臣敢不奉承詔旨庶以仰稱堯禹不爭不伐之心所辭撰到詩義并前進書周禮義序謹隨劄子投進昧冒天明臣無任

乞以所居園室爲僧寺并乞賜額劄子

臣幸遭興運超拔等夷知獎眷憐逮兼父子戴天負地感涕難勝顧迫衰殘糜捐何補不勝螻蟻微願以臣今所居江寧府上元縣園屋爲僧寺一所永遠祝延聖壽如蒙矜許特賜名額庶昭希曠榮與一時仰憑威神誓報無已



乞將田割入蔣山常住劄子

臣父子遭值聖恩所謂千載一時臣榮祿既不及於養親  
勞又不幸嗣息未立奄先朝露臣相次用所得祿賜及蒙  
恩賜勞銀置到江寧府上元縣荒熟田元契共納苗三百  
四十二石七斗七升八合籩一萬七千七百七十二碩小  
麥三十三石五斗二升柴三百二十束鈔二十四貫一百  
六十二文省見託蔣山太平興國寺收歲課為臣父母及  
勞營辦功德欲望聖慈特許施充本寺常住令永遠追薦  
昧冒天威無任祈恩屏營之至取進止

謝宣醫劄子

食浮擬災自取危疾敢籲天聽上煩愍測不圖聞徹特冒

慈憐亟遣內臣挾醫馳降臣背瘡餘毒即得仇煎敷貼平  
完尚以風氣冒闕言語蹇澁又賴杜壬診療尋皆痊愈臣  
迫於衰暮自分捐沒聖時朽泮更生實叨殊賜戴天荷地  
感涕難言臣瞻望闕庭不任屏營汎瀾激切之至



王臨川全集卷四十三終

王臨川全集卷四十四

劄子

乞解機務劄子

臣以羈旅之孤蒙恩收錄待臯東府於今四年方陛下有所變更之初內外小大紛然臣實任其臯戾非賴至明辨察臣宜誅斥久矣在臣所當圖報豈敢復有二心徒以今年以來疾病浸加不任勞劇比嘗粗陳懇款未蒙陛下矜從故復黽勉至今而所苦日甚一日方陛下勵精眾治事專皆欲盡理之時乃以昏疲久尸宰事雖聖恩善貸而臯釁日滋至於不可復容則終上累陛下知人之明非特害臣私義而已臣所以昧冒有今日之乞也伏奉宣諭未賜



哀矜彷徨屏營不知所措然臣所乞固已深慮熟計而後  
敢言與其廢職而至誅則寧違命而獲譴且大臣出入以  
均勞逸乃是祖宗成憲蓋國論所屬怨惡所歸自昔以擅  
其事鮮有不遭辜黜然則祖宗所以處大臣不爲無意也  
臣備位亦已久矣幸蒙全度偶免譴呵實望陛下深念祖  
宗所以處大臣之宜使臣獲粗安使異時復賜驅策臣愚  
不敢辭

二

臣某螻蟻微誠屢煩天聽每蒙訓荅未賜矜從惶怖怔營  
不知所措臣今日奏對近於日旰不敢久留以勤聖體所  
以依違遂退卽非敢食其言以道事君誠爲臣之素守苟

可強勉而免違忤之辜臣亦何敢必其初心實以疾病浸  
加恐墮陛下所付職事上累陛下知人之哲下違臣不能  
則止之義此所以彷徨迫切而不能自止也且臣所乞特  
冀暫均勞逸非敢遂卽田里之安竊謂聖恩不難賜許謹  
具劄子陳乞伏望聖慈特垂開允

三

臣今日得望陛下清光伏蒙敦喻獎激可謂備厚矣臣雖  
愚戇豈敢忘陛下至恩盛德然臣之懇款亦已具陳實望  
陛下照察哀憐使臣得休養其疲昏以免曠職之負而不  
累陛下知人之明也臣干忤天威無任惶怖之至

四



臣今日伏蒙陛下令呂惠卿宣道聖旨又令馮宗道隨賜手詔趣令復位眷顧之厚非臣殺身所能上報然臣不才無補時事肝鬲狼狽已具面陳君臣之義實均父子苟尚可以黽勉豈敢輕爲去就誠以義不獲已須至昧冒天威陛下至仁常恐一物失所況臣特蒙獎擢久備驅策夙夜之勞簡在聖心豈容不思所以全安之而令終於顛躓也伏望哀憐匹夫之志有不可奪早賜處分臣無任瞻天祈恩激切之至取進止

五

臣伏蒙聖恩特降中使傳宣封還所上表不允所乞臣誠惶誠感不知所措竊念臣蒙陛下恩德至深至厚方陛下

肝食焦思之時豈宜自求安佚實以疾疢所嬰曠廢職事若不早遊賢路必且仰誤任使狼狽所愬具如前奏伏惟陛下天地父母曲賜矜憐察臣干祈出於甚不得已臣生當隕首死當結草謹再具劄子陳乞臣無任惶怖狼狽迫祈恩之至

六

臣伏奉聖恩特降中使令臣入見供職臣之懇誠略已昧冒天聽高邈未蒙垂惻輒復陳敘仰冀哀憐伏念臣孤遠疵賤眾之所棄陛下收召拔擢排天下異議而付之以事八年於此矣方陛下興事造功之初羣臣未喻聖志臣當是時志存將順而不知高明疆禦之爲可畏也然聖慮遠



大非愚所及任事以來乖失多矣區區夙夜之勞曾未足以酬萬一之至恩今乃以久擅寵利羣疑並興眾怨總至辜惡之釁將無以免而天又被之疾疢使其意氣昏惰而體力衰疲雖欲疆勉以從事須臾勢所不能然後敢干天威乞解機務竊以謂陛下天地父母宜垂矜憐論其無功則雖可誅閔其有志則或宜宥終始全度使無後艱而未蒙天慈顧哀猶欲疆以重任使臣黽勉尙能有補聖時則雖滅身毀宗無所避憚顧念終無成效而方以危辱上累朝廷此臣所以不敢也陛下明並日月何所不燭願賜容光之地稍委照焉則知臣之惓惓非敢苟忤恩指也臣乞且於東府聽候朝旨伏望陛下垂恩早賜裁處臣不任昧

死干祈激切之至

謝手詔慰撫劄子

臣昨日伏奉手詔所以慰撫備厚非臣疵賤之所宜蒙伏讀不任感激屏營之至今日呂惠卿至臣第具宣聖旨臣雖糜軀隕首豈能上酬獎遇臣自江南召還獲侍清光竊觀天錫陛下聰明睿智誠不難興堯舜之治故不量才力之分時事之宜敢以不肖之身任天下怨誹欲以奉承聖志自與聞政事以來遂及期年未能有所施爲而內外交構合爲沮議專欲誣民以惑聖聽流俗波蕩一至如此陛下又若不能無惑恐臣區區終不足以勝而久妨眾邪之路則或誣罔出於不意有甚於今日以累陛下知人任使



之明故因疾輒求自放陛下不以臣狂猥賜之臯戾而  
屈至尊之意反復誨喻臣豈敢尚有固志以煩督責只候  
開假卽入謝區區所懷冀得面奏臣無任感天荷聖激切  
屏營之至謹具劄子奏知

謝手詔訓諭劄子

臣以不才久曠高位昧冒求解屢煩聖聽曲蒙矜允實荷  
至恩繼奉手詔俯垂訓喻非臣隕首所能報稱伏惟陛下  
躬堯舜盛德舉千載一隆之政以福休斯民萬邦黎獻所  
願致死况臣疎遠疵賤首蒙察舉陛下任之至重而眷之  
至優一旦遠離誠非獲已苟異時陛下未賜棄絕而臣犬  
馬之力尙足以效則豈宜背負恩德長自絕於聖時哉臣

瞻天荷聖無任激切之至

荅手詔封還乞罷政事表劄子

臣今日具表乞罷政事方屏營俟命而呂惠卿至臣第傳  
聖旨趣臣視事續又奉手詔還臣所奉表喻以天下之事  
盡力固可成就以卿所學不宜中輟俛聽伏讀不勝螻蟻  
區區感慨惻怛之至臣蒙拔擢備數大臣陛下所以視遇  
不爲不厚矣豈敢輕爲去就誠以陛下初訪臣以事臣卽  
以變風俗立法度爲先今待臯期年而法度未能一有所  
立風俗未能一有所變朝廷內外誠行邪說乃更多於鄉  
時此臣不能啓迪聖心以信所言之明効也雖無疾疢尙  
當自劾以避賢路况又昏眩難以看讀文字卽於職事當



有廢失雖貪陛下仁聖卓然之資冀憑日月末光粗有所成而自計如此豈容偷假名位坐棄時日以負所學上孤陛下責任之意伏望陛下哀憐矜察許臣所乞毋令臣得要君之嫌重爲流俗小人所毀臣不勝祈天俟聖激切之至取進止

荅手詔令就職劄子

臣累奏乞解機務歸田里伏奉手詔令臣無復有請祇服聖訓便宜就職然臣所以致身許國正欲行事君之義而已若致身於辱殆之地以累陛下知人之明而令天下後世譏議及國則非臣所學事君之義也昔仲山父旣明且哲以保其身故宣王有任賢使能中興之功臣旣不自知

又昧於知人信已妄行以至今日免於大戮實陛下天地父母之賜也若猶冒恩不卽自弛終恐傷陛下保全臣子之心是以不敢伏望陛下哀臣懇至特賜矜許臣無任瞻天祈恩激切之至取進止

荅手詔留居京師劄子

臣伏奉手詔欲留臣京師以爲論道官宜體朕意速具承命奏來臣才能淺薄誤蒙陛下拔擢歷職既久無以報稱加以精力衰耗而咎釁日積是以冒昧乞解重任幸蒙聖恩已賜矜允而繼蒙恩遣呂惠卿傳聖旨欲臣且留京師以備顧問臣竊伏惟念父子荷知遇誠不忍離左右旣又熟計論道之官固非所宜且以置之閑地似爲可處陛下



付託既已得人推誠委任足以助成聖治臣義難以更留  
京師以速官謗若陛下付臣便郡臣不敢不勉至於異時  
或賜驅策卽臣已嘗面奏所不敢辭伏望聖心特賜矜察  
臣無任感天荷聖激切怔營之至伏取進止

辭僕射劄子

臣伏奉制恩以提舉修撰經義了畢特授臣尙書左僕射  
兼門下侍郎加食邑實封承命惶怖已曾面辭宣喻稠疊  
未垂聽允伏念臣特蒙陛下知遇任使實以稍知經術叨  
塵非一每愧無功更以訓釋微勞過受褒遷殊禮格之公  
論孰以爲宜況在私誠尤難安此伏望陛下俯昭惻愍特  
賜哀憐追還誤恩以保危拙謹具劄子陳免以聞

二

臣近具劄子辭免恩命伏蒙聖慈特降詔書不允者區區  
所陳備出肝膈重煩睿訓以懼以慚伏念臣蒙恩自外召  
還復得與聞政事智衰耄及筋力弗支仰惟駿德之日躋  
深懼薄材之難副雖未敢以妨賢自弛顧豈宜以非分妄  
遷賞浮於勞實累國體豈惟私義所不敢安伏望聖慈深  
以保全臣子爲念早賜追還成命以允中外論議之公謹  
再具劄子陳免以聞

三

臣近累具劄子辭免恩命伏蒙聖慈特降詔書不允者睿  
訓丁寧豈宜逋慢顧惟懇款實有可矜干忤天威良非獲



三國川集卷四十四  
已伏念臣出於孤遠遭值聖時弱力而重任薄功而厚享  
夙興夜寐深懼顛隳豈敢非分更叨殊獎且方陛下發明  
經術啓迪人材而臣偶以乏人遂當器使遺經殘缺既不  
易知聖學高明又難仰副雖已強顏應詔實恐難以頒行  
豈意天度包荒藏疾褒崇獎勵在所難勝隆儒尚學誠陛  
下盛德量能知分亦臣之私義伏望聖慈俯照誠悃以其  
終難昧冒早賜追寢誤恩謹三具劄子陳免以聞

乞宮觀劄子

臣某頃被召還復汙宰司行以充滿易墮事以衰疾多廢  
幸蒙恩釋重寄尙兼將相之官自惟憂傷病疾之餘復當  
辭劇就閒之日過叨榮祿非分所宜黽勉方州亦將不逮

故因賜對輒預奏陳俟到江寧須至上煩聖慮乞以本官  
外除一宮觀差遣於江寧養疾過蒙眷獎喻以母然非臣  
糜殞所能仰稱而臣自離闕庭所苦日侵日眩頭昏背寒  
膈壅加之喘逆稍勞輒劇若非蒙恩許免藩任且令休養  
卽恐瘳復無期輒敢昧冒天威具陳前日悃悃伏望陛下  
特垂睿聽俯亮愚誠早賜矜從使得寧濟卽異時稍堪驅  
策誓復罄竭疲駑臣無任

臣某近輸悃悃仰丐恩憐干忤天威方懷憂畏伏蒙聖慈  
特遣使人賚賜訓勅諭以至意撫存顧念逮及存沒負荷  
恩德無以勝任瞻望闕庭唯知感涕然臣之懇懇實有可



言伏念臣抱疾以來衰疲浸劇若黽勉從事必不能上副  
憂勤而應接之勞適足以自妨休養又地閑祿厚非分所  
宜聖心雖示優容臣終難於叨昧伏望陛下俯垂燭察早  
賜矜從他日苟獲夷瘳餘年敢辭驅策臣無任

三

臣某比因馮宗道還闕已具輸區區螻蟻之情繼蒙撫存  
曲賜訓諭臣誠惶誠感已具表稱謝以聞竊惟天慈終始  
眷憐故欲賦以厚祿示以優禮不然一州之守豈憂付屬  
乏人臣憂患餘生加之疾病喘焉朝夕難冀久存陛下所  
以愛臣何啻天地父母令臣多尸廩賜重貽亢滿之殃豈  
若賜以安閑使有寧瘳之福伏望深垂簡照早賜矜從他

日膂力復可驅馳敢不致死以圖報效臣無任

四

臣某備位七年初無分毫績効以病自列獲解繁機而誤  
恩曲加寵祿并過豈臣庸朽所可堪任況自涉春以來眾  
病並作氣滿力憊殆不可支其勢如此以尸厚祿則有食  
浮之憂以任州事則有官曠之責計臣之分無一可爲故  
願乞其不肖之身体養歲月而璽書繼至訓勅加嚴雖陛  
下示眷獎之意始終不逾而臣竊自度量終難黽勉以稱  
萬一徇徨踟躕不知所言輒復干冒天威期於得請而後  
已伏望陛下深垂簡照早賜矜從他日若獲寧瘳顧雖晚  
節末路尙知補報惟所驅策豈敢辭免除已具表謹具劄



子陳乞臣無任

五

臣某近四上表乞以本官外除一官觀差遣伏蒙聖慈特降詔書不允所乞仍斷來章螻蟻之微頻煩寵諭臣之懇誠已具累表愚衷激切終冀矜從伏念臣荷國厚恩未報萬一若非疾苦不能任事豈敢數違訓勅以自取逋慢之誅但以病勢日增雖外視形色若無甚苦而神耗於中力憊於外一有動作卽不可支思慮恍然事多遺忘以此居官豈能塞責且一方之任非獨簿書獄訟在所省察至於儆戒盜賊輯安兵民責在守臣事實至重此豈精神衰耗體力疲憊之人所可堪任伏望陛下加惠畱聽察其所請

出於誠然早賜開允則非獨於臣私分得以自安亦於陛下任使之際無曠官廢事之悔臣愚不勝至願謹復具劄子陳乞臣無任

求退劄子

臣伏奉手詔令臣二十三日入見臣明日當入見然臣之懇款具如前奏所陳匹夫之志有不可奪實望聖慈必賜矜從

已除觀使乞免使相劄子

臣某衰疾疲曳難於自刀干恩天聽至於三四逋慢訓獎辜當誅殛伏奉勅命就除觀使俯從燕安之願欲猶假非分之名器鴻慈覆載不啻天地感激涕沔無言以諭然以



將相之祿養疾於田里歷選近世勳賢未有若斯比例臣愚無狀績効不昭欲以何名敢此叨昧且臣蒙陛下識拔序之羣臣之右當以粗知分義爲異庸人今若以衰殘向盡之年貪非所據豈不自隳素守而仰累陛下知人之明伏望聖慈察臣累奏許以本官充使於江寧府居住冀蒙瘳復終誓糜捐所有効命臣未敢祇受除已具表謹復具陳乞以聞于忤天威臣無任

二

臣某伏奉詔書不允所乞祇荷聖訓丁寧備至非臣庸朽所可堪稱伏自惟念臣以疾病不勝從事之勞而欲自休養退歸田里乃分之宜尙恃眷憐私竊自恕而求以本官食宮觀之祿於外於臣之義媿負已多而陛下乃欲使之兼將相之重而處於此雖仰戴恩德爲至厚矣而臣歷選前代近至本朝所以寵待勳舊之臣無有斯比況臣久尸重任績効不昭豈可度越前人有此叨據是且上虧陛下名器不以假人之道下傷愚臣知止之義伏望特垂睿聽早賜允從則非獨於臣私分得以自安亦於天下公論爲協除已具表謹復具劄子陳乞以聞臣無任

三

臣某近以懇誠上干天聽伏蒙聖慈特降中使賚賜詔書仍斷來章臣以朴愚久逋明命臯譴之及所不敢辭而陛下加惠寬矜慰喻備至仰荷天地厚恩非臣殞越所能報



三  
稱然臣之懇懇亦素具聞分義既所難受臣亦何敢自己  
竊惟人君之御臣以其任隆而責重故委之高爵重祿而  
無媿此上下所以兩得而能治安也今臣既以疲瘵退歸  
閭里尚恃陛下眷存謂其嘗預政事有夙夜之微勤故敢  
求以本宮食宮觀之祿于外已於理分爲所非宜而陛下  
乃疏誤恩使兼將相之重臣愚不肖病不任事顧於陛下  
勵精求治之時不能自力以裨補萬一而坐尸名器如此  
其厚人臣之出力赴功方任隆責重而有勲勞者陛下將  
復何以處之此臣所以不敢也臣若苟貪仰副訓勅而不  
知慮此則非獨於臣私義無以自全亦於國家大體所損  
非細故復冒昧期於得請而後已伏望陛下始終念察早

賜聽許則非獨臣爲幸臣無任

四

臣某近再以懇誠上千睿聽逋慢明訓方虞譴謫伏蒙天  
慈特差臣弟某賚賜詔書不允所乞傳諭德意撫存備厚  
仰荷天地至恩捐軀隕首無以上報伏自惟念臣以衰病  
無勞之身得請於外雖能爲上陳大任一方之寄以忝將  
相尙爲非分況今蒙恩寬假得就燕閒豈可坐而尸此以  
養痾田里之中此臣所以不敢忘止足之義而自取辱殆  
也所懷懇激已具累奏雖陛下申加獎勵恩德有隆而愚  
臣竊自揣稱終無可以叨昧之理伏望陛下俯垂閔察早  
賜開允則非獨臣爲幸甚除已具表謹復具劄子陳乞以



聞臣無任

宣諭蘇子元劄子

臣適已見蘇子元具宣聖旨然兵事貴速憂在失時恐子元往不如期郵行之疾亦恐子元道路偶或有故稽留則無及事臣愚謂宜遞中賜郭達等劄子更錄付子元令申喻曲折

王臨川全集卷四十四終

王臨川全集卷四十五

內制 冊文 表本 青詞

郊祀昊天上帝冊文

伏以眷命作邦百年於此蒙休承福外內用寧施及冲人嗣膺歷服燎禋有典稱秩惟時

郊祀皇地祇冊文

伏以大報于郊有典咸秩厥作成物配天同功合食泰壇義存一體猥以冲眇紹休前人絜承昭事不敢不察

郊祀配帝太祖皇帝冊文

伏以命于帝廷肇造區夏掃除僭悖人以永寧陟配天郊實存舊典靈承圭薦其敢忘初



朝享景靈宮聖祖大帝冊文

伏以靈德在天實基皇命降依下土臨況後人方以眇躬  
進承郊廟神遊所御獻享惟時庶幾顧歆永有蒙賴

朝享仁宗皇帝冊文

伏以體道邁德寵綏臣民休嘉丕延燕及于後肆以寡昧  
獲承郊宮裸饋有儀敢忘用舊

朝享英宗皇帝冊文

伏以靈德美行實兆初潛神民所歆寶命自至祇紹考服  
循而弗改用謚土宇以詒沖人登祔新宮歷茲嘉月燎禋  
有舊裸享惟時

皇后冊文

維熙寧二年歲次己酉四月丁酉朔二十六日壬戌皇帝  
若曰自昔有天下必擇建厥配以承宗廟以御家邦肆朕  
受命奉循前烈考慎典冊以祈協于神民咨爾向氏懿柔  
淑恭舊有顯聞肇功惟祖弼亮帝室流德之澤覃延後嗣  
是產碩媛比賢姜任越朕初載來嬪藩邸盥饋在中率禮  
無違以至嗣服祇承內事齋明夙夜罔有曠失宜崇位號  
表正宮庭今遣攝太尉推忠協謀同德佐理功臣樞密使  
光祿大夫檢校太傅行尚書刑部侍郎上柱國東平郡開  
國公食邑五千戶食實封一千戶呂公弼攝司徒朝散大  
夫右諫議大夫叅知政事護軍太原郡開國侯食邑一千  
一百戶賜紫金魚袋王珪持節冊命爾爲皇后夫惟興王



三  
釐厥士女咸自內始達于四海朕克勤人用弗怠朕克儉人用弗奢朕克正人用無敢側頗僻爾勵朕相乃濟登茲於戲厥初惟艱惟慎厥終爾忱念茲朕以永享天祿爾亦豫膺無疆之福豈不韙哉

先天節皇帝謝內中露香表

伏以眇躬無似實膺駿命之休釐事有初敢廢靈承之舊冀蒙僊聖俯監齋精

天貺節皇帝謝內中露香表

伏以靈命告休嘉名紀節用露熏之故事酬乾施之至恩仰賴監臨俯垂歆祐

降聖節皇帝謝內中露香表

伏以昊天錫命實佑永圖良月御時載臨嘉節率循故事升薦至誠仰冀靈明溥垂庇貺

冬至節皇帝謝內中露香表

伏以四氣隨旋一陽來復仰瞻穹昊祇薦芬香所冀含生並蒙垂福

南郊青城皇帝問太皇太后皇太后聖體表

臣名言自宮徂郊夙夜祇事方此寒沍關於定省伏惟比日寢食宜加

太皇太后回荅皇帝問聖體書

太皇太后致書于皇帝奉祠郊宮爲國大事夙興夜寐固已勤勞勉慎節宣以膺禧福



皇太后回荅太廟皇帝問聖體書

太后致書于皇帝躬率羣臣肇見祖考孝思之至何以自勝尙慎興居以保休福

寒食節起居永定陵宣祖諸陵等處表

伏以榆火戒時柏城在望薦豆籩之新物弗獲躬親象几席之平居實存館御蠲烝有舊絜慕無窮

寒食節起居諸陵昭憲等諸后表

伏以桐華伊始火令載嚴獲嗣慶圖仰蒙慈芘追淑靈而莫逮歷時序以增思

中元節三陵起居諸后表

伏以素秋伊始華月旣盈物以御氣以夷傷心感時而悽愴

伏惟尊謚皇后惠風無斃慈範有詒猥以眇沖仰承慶裕瞻幽靈之所宅結永慕之至懷

八月一日永昭陵旦表

伏以暑往御時宵中應律載班秋朔申薦廟嘗伏惟尊謚皇帝體道成乾施仁應物率土方涵於聖化賓天遽愴於神遊追龍駕於空衢莫知所稅瞻鳥耘之新隴但有至懷

十月一日永昭陵奏告仁宗皇帝旦表

伏以月乘該闕時御閉藏歲回薄以將更物盛多而可享恭惟尊謚皇帝德符穹昊功濟黎元方求大隗之居遂兆成周之葬光靈在望感惻交懷

十月一日起居永安陵等處諸陵表



伏以日星隨旋歲月從邁物更收攜之候人積悽愴之懷  
恭惟尊謚皇帝躬睿廣之材撫休明之運協九皇而高世  
追三后之在天方以眇躬嗣膺神器想威靈之如在感氣  
序以增欷

十月一日起居永安陵等處諸后陵表

伏以哀恫在疚未盡通喪弦晦如流載更良月恭惟尊謚  
皇后降釐媯泐播美河洲著慈範以如存流徽音而可想  
遡陵永望感節深追

冬至節上諸陵表

伏以氣復黃宮晷移北陸物驗土灰之應官修雲物之占  
恭惟尊號皇帝睿廣應期休明作乂收功既往巫範方來

感時序之變流想威靈而慘結

冬至節上諸皇后陵表

伏以四時交御一氣潛萌慶雖屬於履長悲豈忘於追慕  
恭惟尊謚皇后升儷尊極協成修明德範有詒方美王睢  
之摯容衣不闕尙瞻禴翟之華永想光靈詎勝摧感

寒食節上南京鴻慶宮等處太祖諸帝表

伏以火禁肇修春祺溥被維是奉粢之禮適當濡露之時  
恭惟尊謚皇帝德協上穹功施後裔俶神鄉而弗反厥聖  
像以如存縹慕威靈載懷感怵

中元節起居外州諸宮觀諸帝神御殿表

伏以夷則御辰商聲甫協望舒戒節陰魄旣盈伏惟尊號



皇帝道邁往初恩涵品彙於屬車之所御有原廟之舊儀  
方此戒寒豈勝追遠

中元節起居諸陵表

伏以方秋厥初既月之望昊天始肅繁露未晞伏惟尊謚  
皇帝若昔大猷受天明命躬有靈德燕及後昆猥以眇躬  
紹膺慶緒巫恩罔極寧忘駿命之休釐事有初敢廢靈承  
之舊冀蒙僊聖俯鑒齋精

十月一日起居揚州諸帝神御殿表

伏以徂歲如流甫更良月遺衣所御實有經祠方屬投艱  
仰承錫羨瞻威靈而如在歷時序以增思

冬至節上南京鴻慶宮等諸帝表

伏以子位杓回黃宮氣應既兆天正之始方扶陽律之微  
恭惟尊號皇帝體道邁仁膺時建極豫游所次館御如存  
撫時序之變更仰威神而感惻

先天節奏告仁宗皇帝表

伏以金氣御時商聲應律仰閱火流之速俯沾露降之淒  
伏惟仁宗皇帝功協聖謨道侔乾則巫至仁而不冒慶實  
無窮感素節以深追悲何有極

南郊下元節更不於景靈宮朝拜奏告聖祖大帝表

伏以帝繫所元僊遊如在載更令節當款殊庭以卜禋祠  
將陳裸獻惟祭儀之難黷冀神監之具昭

南郊禮畢皇帝謝內中功德表



玉隆川金錄卷四十五  
伏以蠲烝廟祧潔告郊時實蒙芘貺以獲顧歆惟錫福之無窮曷歸誠之有已

南郊禮畢福寧殿奏謝英宗皇帝表

伏以膺命紹休諏時協吉告潔粢於廟室奠嘉玉於郊丘雖祇奉聖謨獲無疆之慶賴而深追神眷重罔極之哀摧真宗皇帝忌辰奏告永定陵景靈宮慈德殿表

伏以慶靈回薄永苴復昆時序徂遷奄更諱日威神在望感沐兼懷

集禧觀開啟爲民祈福祈晴道場默表

伏以雨淫爲苗民用愁墊式陳淨供以致誠祈冀格靈明遂蒙開霽惟潔粢之無害仰休饗之有依

南京鴻慶宮開啟皇帝本命道場青詞

伏以寶命有詒以自求而致福至神無體隨所感而應誠祇奉靈科實存故事冀蒙垂福俯暨含生

延祥觀開啟太皇太后本命道場青詞二道

伏以寶歷有詒眇躬實嗣獲承慈範仰荷神休方元命之在辰按舊儀而庀事庶蒙慶祐永錫壽祺

二

伏以聖功輔世已大濟於艱虞神道示人用寵綬於祉福敢因穀旦祇奉靈科冀大錫於壽祺得永承於慈範

崇先觀奉元殿開啟皇太后本命靈寶道場青詞

伏以克紹慶基實蒙慈訓邁茲元命若昔宗祈冀靈鑒之



三歸川集卷四十五  
七  
俯昭巫壽祺之永錫

靈釐內殿開啓太皇太后生辰道場青詞

伏以壇席盛陳科儀肅設眷言慈廕祝此誕辰永綏壽考之祺上賴神靈之祐

靈釐內殿開啓皇太后生辰道場青詞

伏以集黃冠之勝眾仰紫極之真游按用科儀營祈祉福仰求聰鑒俯應誠心

西太一宮開啓皇太后生辰道場青詞

伏以真聖在天式序照臨之位眇冲嗣歷永惟顧復之恩敢因誕毓之辰祇薦熏修之事仰祈眷祐俯察傾輸推純嘏以及親與羣生而均貺

龍圖閣開啓皇太后生辰道場青詞

伏以妙善可依每俯從於誠悃至恩難報唯仰祝於壽祺祇奉靈科隆施淨供上賴監歆之力永綏顧復之慈

廣聖宮開啓真宗皇帝忌辰道場青詞

伏以深追諱日祇奉靈科仰承神福之繁率用邦儀之舊永惟道廕昭此誠祈

福寧殿罷散三長月祝聖壽道場青詞

伏以順長羸之嘉月按齋戒之靈科庶用熏修溥膺眷祐精衷以薦釐事既成仰賴聖真俯昭誠悃

福寧殿開啓三長月道場青詞

伏以降年有永實繇陰騭之功嗣歷無疆必謹靈承之志



三陽川集卷四十五  
帥時典故若昔科儀仰賴監觀俯壑庇貺

福寧殿罷散三長月道場青詞

伏以監觀在上禳祝有儀祇率舊章仰祈况施茂惟休福  
俯逮烝黎

福寧殿開啓三長月道場青詞

伏以臯月紀時凱風應律罄齋精而上禱冀真聖之俯臨  
永賴監觀普壑庇祐敢忘寅畏仰荅顧歆

福寧殿罷散三長月道場青詞

伏以協用靈科宗祈永命惟神心之降格獲釐事之告成  
冀與羣元並膺湯福

福寧殿開啓南郊道場青詞

伏以欽柴宗祈爲國大事前期齋禱舊典有稽仰冀靈明  
俯壑眷祐



王臨川全集卷四十五終

王臨川全集卷四十六

內制

青詞

密詞

詞

祝文

齋文

景靈宮三殿看經堂開啟中元節道場青詞

以三元令節釐事有經祗薦潔誠宗祈祉福仰繫庇貺覃及庶黎

景靈宮保寧閣下元節道場青詞

伏以殊廷外建嘉節俯臨夙設靈壇蠲烝順祝冀蒙真聖垂祐羣黎

醴泉觀寧聖殿開啟為民祈福保夏道場青詞

伏以聖真丕冒品庶具依當蕃啟之盛時用熏修之故事仰祈聰直俯鑒齋精溼庇祐之仁申錫壽康之福



醴泉觀寧聖殿開啟年交道場青詞

伏以像圖夙設壇席載嚴當此歲陰之交率時禳祝之舊  
仰惟庇貺俯逮黎元

集禧觀洪福殿開啟謝雨道場青詞

伏以旱暵成災懼物生之疵癘被齋以禱荷神睠之顧綏  
載闢靈場式陳昭報尙冀涵濡之施以終庇祐之仁

在京諸宮觀景靈宮等處祈雪青詞

伏以華歲幾終同雲未兆物將疵癘咎在眇冲敢罄齋精  
上求嘉應冀蒙貺施孚祐含生

謝晴青詞

伏以密雲作雨暘不時若蒙神賜祐菑疹用除奔走被齋

以謝靈貺祀儀有秩不敢怠忘

坊州秋祭聖祖大帝青詞

伏以祠城在望御館如存敢因拏歛之辰祇用吉蠲之薦  
冀蒙巫祐俯賜降歆

滄瀛州地震設醮青詞

伏以地德安靜震非其常陰陽厥愆以告咎罰禴禳有典  
仰賴監歆所冀方隅具膺庇貺

二

伏以自河以北坤載不寧敷置淨筵以祈後福仰惟皇覺  
敷祐羣生監此齋精俯垂庇貺

北嶽廟爲定州地震開啟祭禱道場青詞



恭以地職持載靜惟其常今茲震搖以警不德涉河而北  
又用驚騷惟嶽有神芘綏厥壤祓除祠館按用祈儀請命  
上靈冀蒙孚佑敢忘寅畏以荅眷歆

集禧觀開啟保夏祝聖壽金籙道場密詞

伏以時在炎烝物方蕃祉卽祠庭之精闕竭清道之嚴祇  
仰冀監觀俯垂庇祐具綏福履申弭疾殃覃及羣黎永膺  
戩穀

崇先觀開啟保夏祝聖壽金籙道場密詞

伏以眷祐無疆熏修有舊尙朱明之紀候祈蒼昊之聖仁  
中錫休嘉外覃品庶敢忘靈承之志永膺丕冒之恩

延福宮開啟皇后生辰道場密詞

伏以統治后宮協承先廟誕辰俯及釐事有常惟萬德之  
博臨冀百祥之永錫

延福宮開啟皇太后生辰道場密詞

伏以協承寶命恩維拊育之深俯應羣情法有總持之妙  
齋場夙設慶事備終敢祈西竺之威神永佑東朝之福履  
金明池開啟謝雨道場密詞

伏以蕃啟在時蘊隆爲虐罄齋精而上禱蒙膏潤之旁流  
祇報靈休式陳淨供尙祈終賜無使後艱

興國寺開先殿奏告太祖皇帝孝明皇后祝文

伏以像設有嚴神游所御瞻衣冠而如在懼風雨之弗除  
庀事將興涓辰旣吉永賴靈明之鑒俯昭怵惕之懷



西京應天禪院奏告太祖太宗真宗皇帝御容祝文

告遷奉安還  
本殿之意

伏以殊庭有恤館御如存吉日既蠲繕修惟謹式陳嘉薦以妥明靈

啟聖院永隆殿奏告太宗皇帝元德皇后祝文

伏以威神所感營繕有期考禮舊章宜時潔告茂惟靈德俯鑒至懷

太廟八室奉慈諸廟奏告南郊等處祝文

伏以三歲一郊實昭大報前期潔告國有故常侔翼靈明俯陟鑒祐

諸皇后陵奏告謝南郊禮畢祝文

伏以禋饗郊宮國之重事唯蒙慈庇以獲休成筴祝有經敢忘用舊

景靈宮英德殿奉安英宗皇帝御容祝文

伏以先聖舊祠祖宗所御嗣興寶構追奉靈游諏日既嘉具儀以妥徂惟在上永保厥寧

天章閣延昌殿權奉安英宗皇帝御容祝文

伏以相名山於洛宅既兆寢園倣原廟於漢儀將遷館御潔除祕宇嚴奉晬容冀靈蹕之少安副衷情之罔極

西京應天禪院拆修太祖神御殿祭告祝文

廟刹有嚴威神所御將改新於寶構永欽奉於晬容仰冀靈明俯陟鑒祐



景靈宮修蓋英宗皇帝神御殿上梁祭告太歲已下  
諸神祝文

伏以欽奉僊游肇營寶構舉修梁而揆日具蠲飾以寧神  
祓此後艱仰繫大祐

慈孝寺崇真彰德殿爲經霖雨巫脊脫落奏告祝文  
伏以雨淫告災垣屋或壞惟神所御有圯弗支諷用靈辰  
改新厥構蠲爲祇薦於禮有常

太廟后廟奉慈廟雅飾告

伏以三歲一郊祖宗成法靈明所御繪飾有時方此儻工  
禮當潔告

西太一宮立秋祝文

伏以候火旣流占灰南應真游所御靈時具存率循舊章  
作薦常事仰祈錫福大芘含生

中太一宮立冬祝文

伏以館御國郊庇祝天物祠宮筴祝在禮有經涓選吉時  
作薦常事敢祈孚祐施及羣黎

九宮貴神祝文

伏以下用靈辰躬修禋享清壇所兆潔告有常

景靈宮里域真官祝文

伏以宗祈陽郊祇見神祖葆茲淨域夙賴真靈祇率舊章  
式陳嘉薦

天地社稷宮觀等處祈晴雨詞祝文



積陰爲沴淫雨弗止蕩決漂墊將爲民菑懼德不類以干咎罰是用齋祓宗祈明靈冀蒙垂矜遂獲開霽休嘉之錫實被含生

五嶽四瀆諸廟祈晴祝文

淫雨弗止將爲民菑懼德不孚以罹咎罰是用奔走禱于明神惟神監觀惠以時暘非民獨蒙嘉福神亦永有休享

定州北嶽爲地震祭禱祝文

伏以自河以北陽出鎮陰人用不寧咎由非德永惟聰直庇祐一方祗飭使人齋精以禱尙蒙歆鑒無有後艱

文德殿告遷御容祝文

伏以綬冠卽事喪紀有終黼座歆神哀懷靡極度新宮而

館御諏吉日以徂遷式冀靈明永歆豐潔

南郊青城綵內畢功大殿上開啟保安祝壽諷孔雀

明王經齋文

伏以祀兆方嚴齋場夙設實延淨眾開誦梵文旣蒙大施之仁助錫丕平之福

南郊青城綵內畢功大殿土開啟保安祝壽諷法華

經齋文

伏以帷宮旣具皇邸將臨發誦祕文施其景福仰惟覺慈之覆俯綏禮享之成

五臺開啟南郊禮畢道場齋文

伏以靈承在上懼休命之難大報于郊惟盛儀之獲祇循



故事恪報厥成仰賴顧歆終壘庇祝

內中延福宮性智殿開啟太皇太后生辰道場齋文  
伏以大陰協兆良月御時猥以眇躬獲承慈範敢因敷旦  
祗集勝緣實蒙等慈具綏景福

十月一日永昭陵下宮開啟資薦仁宗皇帝道場齋

文

伏以大明光藏上智之所發揮妙摠持門羣靈之所歸賴  
歲陰逝矣陵闕超然憑淨眾以有所冀真遊之無礙

福寧殿開啟資薦英宗皇帝道場齋文

伏以憑几之言未遠滌場之候更新摧慕安窮攀號靡及  
旁招淨眾歸誠甘露之門仰祝靈游取證法雲之地

中元節福寧殿水陸道場資薦英宗皇帝道場齋文

伏以正等上緣含生永賴薦龍施之淨供助宿植于神游  
仰冀靈明俯昭哀懇

萬壽觀廣愛殿資薦章惠皇太后忌辰道場齋文

伏以諱日俯臨祠庭外闕遊東黃冠之眾宗祈紫極之神  
按用前科追營後福庶超升之莫禦繫庇祝之有加

天章閣延昌殿開啟權奉安英宗皇帝御容道場齋

文

伏以翠旌所御玉色如存將改泣於清閭少卽安於祕近  
旁招淨眾仰助勝緣憑妙覺之總持冀皇靈之升濟

溫成皇后陵獻殿內開啟冬節道場齋文



伏以光靈所宅崇奉有儀因令節以熏修冀具乘之祈助  
仰希錫福俯逮含生

金明池上開啟祈雨粉壇道場齋文

伏以肅設祠壇宗祈解澤膏潤之祥甫兆赫炎之慶更深  
實時靈明厚矜黎庶遂令沾足用格豐穰

金明池上開啟謝雨道場齋文

伏以常暘告罰將害燠盛夙設靈場載祈膏澤神休既格  
昭報有儀尚惟孚佑之仁終保嘉生之享

龍圖天章寶文閣接續開啟祈雪道場齋文

伏以歲序就窮尚愆嘉雪能仁應世閔此含生冀佑上靈  
錫之休證式陳淨供以告齋誠

泗州塔謝晴齋文

大雷于民淫雨不止祓除齋戒並走以祈實蒙等慈俯應  
誠悃永惟庇貺其敢弭忘

後苑天王殿拆修了畢齋文

伏以擬辰居之奧密飭祆像之嚴威繕治告功祓齋祈福  
庶憑至善永保多盤



王臨川全集卷四十六終

王臨川全集卷四十七

內制 詔書

勅榜交趾

勅交州管內溪峒軍民官吏等眷惟安南世受王爵撫納之厚實自先朝含容厥愆以至今日而乃攻犯城邑殺傷吏民干國之紀刑茲無赦致天之討師則有名已差吏部員外郎充天章閣待制趙高充安南道行營馬步軍都總管經略安撫招討使兼廣南安撫使昭宣使嘉州防禦使入內內侍省都押班李憲充副使龍衛四廂都總管指揮使忠州刺史燕達充副都總管順時興師水陸兼進天示助順已兆布新之祥人知悔亡咸懷敵愾之氣然王師所



王臨川集卷四十七  
至弗迓克奔咨爾士庶久淪塗炭如能諭王內附率眾自歸爵祿賞賜當倍常科舊惡宿負一皆原滌乾德幼稚政非已出造廷之日待遇如初朕言不渝眾聽無惑比聞編戶極困誅求已戒使人具宣恩旨暴征橫賦到卽蠲除冀我一方永爲樂土

提轉考課勅詞

先王考績之次序雖見於經而其詳不傳於後世朕若稽古以修眾功而諸路刺舉之官未有以考其賢否比勅有司詳議厥制條奏來上詢謀悉同其使布宣以勵能者而擇左右可信之良使典治之古人有言徒善不足以爲政徒法不能以自行今朕有念功樂善之志焉而又繼之黜

陟幽明之法以待天下之大吏矣然非夫任事之臣躬率以正而考慎其實與士大夫宣力于外者皆安于禮義而不以便文徼幸爲姦則朕之志豈能獨信於天下而法亦何恃以行哉咨爾在位其各悉力一心務祇新書以稱朕至誠惻怛之意

韓琦加恩制

門下朕祇率舊章肇稱吉禮對越天地具獲靈明之歆相維公卿並膺休顯之賜其孚大號以寵元勳推誠保德崇仁守正協恭贊治亮節翊戴功臣淮南節度揚州管內觀察處置營田等使開府儀同三司守司徒檢校太師兼侍中行揚州大都督府長史上柱國魏國公食邑一萬三千



七百戶食實封五千戶韓琦躬受偉材出陪熙運保茲天子進無浮實之名正是國人退有顧言之行問朝廷之兩社揉方域之萬邦辰猷具臧器實加重中辭機軸之要外卽蕃屏之安衡統紘縱備三公服飾之盛橐兜戟纛兼大將威儀之多序績旣崇修厲彌謹協成宗祈之禮與有顯助之勞肆衍本封申加美稱於戲恩典徽數所以旌帝臣明德茂功所以獎王室往惟勵翼服此褒嘉可特授依前守司徒檢校太師兼侍中行揚州大都督府長史魏國公充淮南節度揚州管內觀察處置營田等使加食邑七百戶食實封四百戶仍賜推誠保德崇仁守正協恭贊治亮節佐運翊戴功臣散官勳如故主者施行

李璋加恩制

門下朕若昔大猷紹天明命必有獻享之禮作民恭先必有褒嘉之恩自國貴始翊衛功臣奉宰軍節度鄭州管內觀察處置河堤等使光祿大夫檢校司空使持節鄭州諸軍事鄭州刺史兼御史大夫上柱國平原郡開國公食邑四千三百戶食實封一千戶李璋世載忠善躬服儉勤以后家之洪支爲帝室之隆棟入總營衛則兵師無譁出乘蕃維則吏屬不怠近付京都之鑰外更方鎮之旄貢職惟修祀儀獲考進加功號申衍邑封以疇服采之勤其協勸勞之典於戲貴富有危溢之可戒祿位匪侈驕之與期圖惟慶譽之終尙協龍光之施可特授依前檢校司空使持



三  
節鄭州諸軍事鄭州刺史兼御史大夫充奉寧軍節度鄭  
州管內觀察處置等使加食邑七百戶仍賜翊衛忠果功  
臣散官勳封如故主者施行

皇伯祖威德軍節度使榮國公承亮加恩制

門下朕裸獻廟室燎禋郊丘內蒙祖考之居歆外獲神祇  
之顧饗嘉我近屬與有陪輔之勞揚於大庭使膺褒顯之  
福具官某德義自表爵齒兼尊魁然肅艾之材尙矣神靈  
之胄世承厥慶有跼萼之芬華胡賴以寧若翰蕃之嚴密  
乃相肆祀實綏思成進加奠食之封申錫詔功之號於戲  
孝恭可以儀宗室信厚可以化邦人匪時親賢孰朕承翼  
往肩寵獎尙協榮懷可

李日尊加恩制

門下朕紹膺駿命稽用上儀祇事郊宮並受三神之福推  
恩方夏外交四表之歡告于有司錫是在服推誠保節同  
德守正順化翊戴功臣靜海軍節度觀察處置等使同中  
書門下平章事李日尊躬懷德善世濟忠勤奠茲南邦居  
有扞城之效衛我中國使無疆場之虞賜之大將之旄旆  
之眞王之爵往踐厥位知欣戴於寵章來獻其琛用協成  
於熙事陪敦采邑褒進文階載加眞食之封式允懋功之  
典於戲人之所助惟怙冒於王靈國以永存顧循守於侯  
度率時新命保乃舊邦可

馮翊郡君連氏等賀皇帝南郊禮畢表



伏以廟饗蠲烝郊柴昭報仰格神靈之饗俯均夷夏之歡  
中賀伏惟皇帝陛下道協欽明德兼神武攬御今之皇策  
考嚴上之帝儀禮威盛容茂實存乎六世恩典徽數賚并  
及於萬方妾備數先朝叨榮中禁親逢累洽竊用交欣妾  
無任

德妃苗氏上賀皇帝南郊禮畢表

伏以靈承廟祐祇載郊丘既來萬國之歡遂格三靈之祐  
中賀恭惟皇帝陛下徇齊成性睿廣膺期神罔時恫方紹  
休於大業聖爲能饗乃獲考於上儀妾逮侍先朝親逢盛  
事觀瞻有煒欣賴實多妾無任

賜太子太傅致仕梁適太子太師致仕張昇特赴闕

李日尊加恩制

門下朕紹膺駿命稽用上儀祇事郊宮並受三神之福推  
恩方夏外交四表之歡告于有司錫是在服推誠保節同  
德守正順化翊戴功臣靜海軍節度觀察處置等使同中  
書門下平章事李日尊躬懷德善世濟忠勤奠茲南邦居  
有扞城之效衛我中國使無疆場之虞賜之大將之旌昨  
之眞王之爵往踐厥位知欣戴於寵章來獻其琛用協成  
於熙事陪敦采邑褒進文階載加眞食之封式允懋功之  
典於戲人之所助惟怙冒於王靈國以永存顧循守於侯  
度率時新命保乃舊邦可

馮翊郡君連氏等賀皇帝南郊禮畢表



三國川名卷四十七 四  
伏以廟饗蠲烝郊柴昭報仰格神靈之饗俯均夷夏之歡  
中賀伏惟皇帝陛下道協欽明德兼神武攬御今之皇策  
考嚴上之帝儀禮威盛容茂實存乎六世恩典徽數賚并  
及於萬方妾備數先朝叨榮中禁親逢累洽竊用交欣妾  
無任

德妃苗氏上賀皇帝南郊禮畢表

伏以靈承廟祐祇載郊丘既來萬國之歡遂格三靈之祐  
中賀恭惟皇帝陛下徇齊成性睿廣膺期神罔時恫方紹  
休於大業聖爲能饗乃獲考於上儀妾逮侍先朝親逢盛  
事觀瞻有煒欣賴實多妾無任

賜太子太傅致仕梁適太子太師致仕張昇特赴闕

相州詔

卿當國家之多難任社稷之至憂實能忠勤以濟勳績方  
均逸豫適此外虞煩我元功良非得已亦惟體國義不辭  
勞今雖尙謀經武之時非有蒐兵伐罪之事坐臨諸帥固  
可優游何必舊邦乃能休養勉綏居息以副倚毗

賜守司徒檢校太師兼侍中韓琦詔

便道之鎮朝廷故常來朝京師朕意所欲使事曲折旣當  
聞知忠言嘉謨又所饑渴雖知勤勩可不勉哉

賜韓琦依所乞詔

勅韓琦奏乞由河陰本路赴相州安泊骨肉行李訖徑乘  
遞馬赴闕朝見奏事訖還赴本任稍從私便事具悉舊德



元功久於方面嘉言讜論所欲亟聞其來造朝然後之鎮  
義當黽勉無或告勞

賜守司徒檢校太師兼侍中判永興軍韓琦乞相州  
舊任不允詔三道

勅韓琦卿明德茂勳具書帝籍祖考所付以屏毗朕躬比  
辭國均已會邊隙故煩元老屬此憂勤今羌雖來柔疆事  
弛經營科治改命爲難莫府坐籌制其大略雖聞稍億  
可少安義有固然朕言無戲

二

琦羌夷變態未易究知邊塞繕完所宜申飭以卿望  
當并羣策以有爲遂措一方於無事乃來告

疾冀得燕閒主爾忘身忠賢之義勉膺重寄務體至懷

三

勅韓琦卿茂德儁功朝廷所賴方解政幾之劇重分疆事  
之憂種落綏和酋渠嚮順永惟邊鎮猶恃老成所須經武  
之遠謀及此暇時而備豫當思體國無卻告勞

賜守司徒檢校太師兼侍中判永興軍韓琦乞致仕  
不允詔

勅韓琦朕初嗣位不敢暇逸惟畏天命亦惟閔民蠢茲一  
方尙戒羌夷制變備豫扞菑禦侮庶幾元老克協朕心若  
其憚勤誰與謀此勉祇厥服用副至懷

賜判永興軍韓琦湯藥詔



王臨川集卷四十一  
七  
勅韓琦任隆三事寄重一方比聞經制之勞或爽節宣之  
序特馳使傳往喻朕懷宜有分頒以資衛養

賜允觀文殿學士尙書左僕射新除集禧觀使富弼

辭免乞判汝州詔

卿翊朕祖考功施于時德善在躬終始如一祠庭置使實  
近闕門邦有大疑庶幾求助忠賢體國義乃可畱而引喻  
再三便於出守重違懇惻姑卽所安故茲詔示想宜知悉  
賜判汝州富弼乞致仕不允詔

勅富弼卿忠純亮直爲國元老朕所恃賴急於典刑優游  
小邦足以養疾冀緩福履來副詢謀何必言歸以孤眷矚  
賜判汝州富弼乞假養疾詔

眷我元老數更悲傷比飭使人往宣至意乃觀來諭未卽  
康寧姑順誠懷勉綏吉祿

賜判汝州富弼乞赴安州避災養疾詔

比飭使人具宣至意就令賜告冀遂寧瘳卿嚴祇朕命不  
敢違息顧念吏卒閔其滯畱觸熱載馳用忘勤勩恭以事  
上卿實有之仁及賤微又能如此忠誠所惻豈獨朕心從  
容小邦姑以養福勉綏吉祿母恤後艱故茲詔示想宜知  
悉

賜判汝州富弼赴闕詔二道

勅富弼卿中解政機外分符守久於窮僻衛養或愆優游  
京師可以治疾謂當趣駕以副虛懷



王臨川集卷四十一  
二  
勅富弼久解政機薦分符守元功茂德朕所注心渴聞嘉猷以輔不逮

賜富弼赴闕并茶藥詔

勅富弼適自州藩來還朝位眷馳驅之良苦懼衛養之或愆當有寵頒以昭勤仁

賜判汝州富弼辭免南郊禮畢支賜詔

勅富弼省所奏免南郊支賜受釐于神賚及蠻貊卿勳德兼茂中外具瞻恩典所加當先羣辟區區一賜何足以辭當體眷懷其膺貺施

賜宰相曾公亮已下辭南郊賜賚不允詔

勅公亮等朕初嗣服於祖宗之制未有所改也卿等選於黎獻位冠百工或受或辭人用觀政朝廷予奪所以馭臣貴賤有差勢如堂陛惟先王之制國用視時民數之多寡方今生齒既蕃而賦入又爲不少理財之義殆有可思此之不圖而姑務自損祇傷國體不協朕心方與勳賢慮其大者區區一賜何足以言

賜觀文殿學士新除刑部尙書知大名府陳升之辭免恩命不允詔

勅升之設都置守綏御一方付得其材乃能往又卿嘉謀美績簡在朕心選於羣臣用有畀屬申明經略臨制事幾中外踐更效皆已試勉祇厥服於義爲宜



賜觀文殿學士刑部尙書知大名府陳升之赴闕朝

見茶藥詔

勅升之往司宮鑰來次郊園炎歊之序未徂踐涉之勤已至當馳榮賜以示眷懷

賜觀文殿學士刑部尙書知亳州歐陽修上表奏乞

致仕不允詔

勅修股肱名臣與國同體禮當得謝朕尙難之况年非告老之時而勳在受遺之籍不畱屏輔人謂斯何姑體至懷少安厥位

賜知亳州歐陽修陳乞致仕第二表不允詔

勅修卿勳德之舊簡在帝心從容一州足以休養而抗奏

至於四五必以田里爲歸豈朕視遇故老有不足於禮乎何其求去之果也欲喻至意莫知所言惟能勉畱實副勤仁

賜知亳州歐陽修第三表并劄子陳乞致仕不允詔

勅修省所三上表并劄子奏乞致仕事具悉卿翊戴三朝清明諒直有言有績著在朕心重違勤求外寄藩屏邦之雋老不以遐遺所冀輸誠常存帝室而納祿與職至于再三雖潔身之風可激貪冒顧許國之義未協忠嘉姑體眷懷勉膺圖任所請宜不允

賜觀文殿學士兵部尙書歐陽修辭知青州不允詔

二道



勅修海岱名都太公舊履鎮撫一路朕難其材卿實元勳以忠許國謂當亟往臥以治之冀能優游寧此東土

二

勅修卿純誠直諒中外所知辭祿就閑志非有激進官治劇義乃無嫌矧茲東州可以居息方之守毫勞逸殆均朕命惟行謂當遄往

賜荅曾公亮詔

眚哉變異以戒人君推之股肱朕所不取元勳舊德實賴交修譴告之來必緣象類明喻朕志使當天心庶幾君臣並受遐福不務出此而果於辭讓是惟保身豈曰謀國

賜張方平免特支請俸詔

勅方平省所奏劄子陳免特支請俸事具悉卿躬肅艾之材豫辯章之論致喪無貳雖非謀國之時班祿有差是乃養賢之意抗言來諗引義甚明重盥素懷姑循近制

賜樞密副使右諫議大夫邵亢乞郡詔

勅邵亢卿先帝所命以翊朕躬升執事樞方觀勳效遽欲辭位殆非所宜衛養少愆何憂不已勉共厥服思協朕心賜皇伯新除彰化軍節度觀察畱後安定郡王從式乞免新命不允詔

勅從式卿躬雋艾之材出神明之胄選於宗室則屬近而行尊聞在朝廷又年高而德劭膺茲褒顯人以爲宜勉服官封永綏吉祿



賜涇原路經略使蔡挺茶藥詔

卿方用時材出分帥路適茲寒苦良已勤勞特推撫賜之恩以示眷懷之意

賜天章閣待制知渭州蔡挺獎諭詔

封疆之虞責在將帥厥有績效不忘于心卿久以才稱外分方任乘機踐事能兆厥謀板築告功于疆就募保彼居園可無後憂倚言若茲朕所嘉歎

賜知唐州光祿卿高賦獎諭詔

召杜南陽世稱循吏其亡久矣朕尚思之卿招懷饑流墾闢荒梗繕修陂塢績効具昭前人之良何以逮此閱奏歎美不忘于心



